

周易程朱傳義折衷

周長恆參博覽新頁

欽定四庫全書

周易程朱傳義折衷卷二十三

元 趙采 撰

䷗ 乾下
兌上

程子曰序卦益而不已必決故受之以夬夬者決也
益之極必決而後止理無常益益而不已已乃決也
夬所以次益也為卦兌上乾下以二體言之澤水之
聚也乃上於至高之處有潰決之象以爻言之五陽

在下長而將極一陰在上消而將盡衆陽上進決去一陰所以為夬也夬者剛決之義衆陽進而決去一陰君子道長小人消衰將盡之時也

夬揚于王庭孚號有厲

程子曰小人方盛之時君子之道未勝安能顯然以正道決去之故含晦俟時漸圖消之之道今既小人衰微君子道盛當顯行之於公朝使人明知善惡故云揚于王庭孚信之在中誠意也號者命衆之辭君

子之道雖長盛而不敢忘戒備故至誠以命衆使知
尚有危道雖以此之甚盛決彼之甚衰若易而無備
則有不虞之悔是尚有危理必有戒懼之心則無患
也聖人設戒之意深矣

告自邑不利即戎利有攸往

程子曰君子之治小人以其不善也必以己之善道
勝革之故聖王誅亂必先修己舜之敷文德是也邑
私邑告自邑先自治也以衆陽之盛決於一陰力固

有餘然不可極其剛至於太過太過乃如蒙上九之
為寇也戎兵者強武之事不利即戎謂不宜尚壯武
也即從也從戎尚武也利有攸往陽雖盛未極乎上
陰雖微猶有未去是小人尚有存者君子之道有未
至也故宜進而往也不尚剛武而其道益進乃夬之
善也

朱子曰夬決也陽決陰也三月之卦也以五陽去一
陰決之而已然其決之也必正名其罪而盡誠以呼

號其衆相與合力然亦尚有危厲不可安肆又當先
治其私而不可專尚威武則利有所往也皆戒之之
辭

彖曰夬決也剛決柔也健而說決而和

程子曰夬為決義五陽決上之一陰也健而說決而
和以二體言卦才也下健而上說是健而能說決而
能和決之至善也兌說為和

揚于王庭柔乘五剛也孚號有厲其危乃光也

柔雖消矣然居五剛之上猶為乘陵之象陰而乘陽非理之甚君子勢既足以去之當顯揚其罪於王朝大庭使衆知善惡也盡誠信以命其衆而知有危懼則君子之道乃無虞而光大也

告自邑不利即戎所尚乃窮也利有攸往剛長乃終也當先自治不宜專尚剛武即戎則所尚乃至窮極矣
夬之時所尚謂剛武也陽剛雖甚長猶未終尚有一陰更當決去則君子之道純一而無害之者矣乃剛

長之終也

愚曰此卦以二體言則乾健而兌說乾決而兌和以互伏言則上體伏艮為庭左傳陳侯筮遇觀之否曰庭實旅百杜氏曰艮為門庭以爻變言上六與九三相應成巽離巽為號巽風者天之號令故號令號呼命皆取巽象離為光以卦變言夬自姤變一變同人二變履三變小畜四變大有同人六二自坤來坤為邑履下卦兌為口告邑也自同人

至大有皆有離象離為戈兵戎也夫史五陽決一
陰勢至易也今觀繇彖爻辭皆不言吉而有危懼
之詞者斷蛇不殛刺虎不斃傷人愈多是以聖人
為君子謀而憂小人者其戒有四何者上六以一
柔乘五剛其害未易去也故揚于王庭聲其乘剛
之罪憂其罪不白彼尚有詞而未去其戒一也王
庭之號令乎矣天下皆信君子之所為矣而猶欲
君子之有厲者蓋憂君子無危厲之心則事或疎

而小人之為謀也莫測其戒二也罪白矣號孚矣
心厲矣然猶曰告自邑者蓋憂小人之魁去而小
人之餘黨尚存故告于吾國中使反側者安而小
人之餘黨自離可也若君子自以為吾五陽已盛
不用告而遽加誅焉則君側之惡不可以兵兵之
則小人之勢窮而黨復合非君子之利也其戒三
也即戎雖非君子之利然五陽不往則一陰不退
故又曰利有攸往曰剛長乃終蓋欲五陽往而剛

長則一陰消而陽純此聖人望君子終之之事也
剛不長陽不純君子不終也

象曰澤上於天夬君子以施祿及下居德則忌

程子曰澤水之聚也而上於天至高之處故為夬象
君子觀澤決於上而注漑於下之象則以施祿及下
謂施其祿澤以及於下也觀其潰決之象則以居德
則忌居德謂安處其德則約也忌防也謂約立防禁
有防禁則無潰散也王弼作明忌亦通不云澤在天

上而云澤上於天則意不安而有決潰之勢云在天
上乃安辭也

愚曰澤上於天則為雨有澤物之象焉萬物之所
欣快也故君子以之施祿及下施祿及下可也而
以德自居則不可也忌當作畏忌之忌言可以施
祿及下所忌者自居其德天降雨澤於下亦豈自
居其德哉則夫決去小人亦不可自居其功也
初九壯于前趾往不勝為咎象曰不勝而往咎也

程子曰九陽爻而乾體剛健在上之物乃在下而居
決時壯于前進者也前趾謂進行人之決於行也行
而宜則其決為是往而不宜則決之過也故往而不
勝則為咎也夬之時而往往決也故以勝負言九居
初而壯於進躁於動者也故有不勝之戒陰雖將盡
而已之躁動自宜有不勝之咎不計彼也人之行必
度其事可為然後決之則無過矣理不能勝而且往
其咎可知凡行而有咎者皆決之過也

愚曰大壯震在上為足初九在下體之下如足之
動趾也史自大壯而積大壯既以四剛而壯趾矣
今史五剛則初九壯于前大壯之趾矣大壯初九
云征凶者以初無應不可動而先動也今初亦無
應又震足毀折此豈可動而往哉往則必不勝夫
見勝而往勝在往前不能必其勝而往宜其為咎
矣陽好動而剛喜自任故聖人戒之以此
九二惕號莫夜有戎勿恤象曰有戎勿恤得中道也

程子曰夫者陽決陰君子決小人之時不可忘戒備也陽長將極之時而二處中居柔不為過剛能知戒備處丈之至善也內懷兢惕而外嚴戒號雖莫夜有兵戎亦可勿恤矣莫夜有兵戎可懼之甚也然可勿恤者以自處之善也既得中道又知惕懼且有戒備何事之足恤也九居二雖得中然非正其為至善何也曰陽決陰君子決小人而得中豈有不正也知時識勢學易之大方也

朱子曰九二當決之時剛而居柔又得中道故能憂惕號呼以自戒備而莫夜有戎亦可無患也

愚曰九二動成離巽離目巽多白眼惕懼之象巽為號故曰惕號離日在兌方之下莫也巽為入日入于地莫夜也離為戈兵戎也坎為憂離見坎伏勿恤也莫夜者陰伏之時也小人之害君子必陰伏而潛中之今九二君子以剛居柔德壯而小心於莫夜之時必危惕而申警之則有備無患雖有